

## CAMBIO TEMPORAL NA ACCESO DI WAF DI ORANJESTAD



[WWW.SOLODIPUEBLO.COM](http://WWW.SOLODIPUEBLO.COM)



[SOLODIPUEBLO@GMAIL.COM](mailto:SOLODIPUEBLO@GMAIL.COM)

## MAN DRECHI DI GERLIEN A LEAK INFORMACION MIKE DE MEZA DEBE 2 MIYON NA BELASTING Y NO TA PASA SCREENING



## HUES A POSPONE CASO CONTRA HOMBER SOSPECHA DI A MALTRATA POLIS



Awor cu tin espacio financiero  
**FRACCION DI MEP DESDE PARLAMENTO LO  
PERCURA PA INSTITUTONAN ENCARGA CU  
NOS MUCHNANAN SPECIAL HAYA E FONDO  
NECESARIO PA POR DUNA E MUCHANAN E  
ATENCION CU NAN MESTER**



## CLA PA REPRESENTA ARUBA NA E NIVEL MAS HALTO DI KARATE KUMITE





# CAMBIO TEMPORAL NA ACCESO DI WAF DI ORANJESTAD

Como parti di mehoracion y mantencion continuo di e waf na Oranjestad, Aruba Ports Authority N.V. (APA) lo ta ehecutando e proyecto di asfaltering y mehoracion di e caminda na Gate 7 y e parkeerplaats banda p'ariba di oficina principal di APA na L.G. Smith Blvd. 23. Pa tal motibo, Gate 7 lo ta cera temporalmente. APA ta pidi pa tur usuario di waf tene cuenta cu e siguiente cambionan pa loke ta acceso na e waf di Oranjestad y oficina principal di APA:

• E trabou di asfaltering lo ta entre 22 di april y 23 di mei 2025.

**ACCESO NA WAF DI ORANJESTAD:**

• Ariba diano cu no tin barco crucero den waf, acceso na waf di Oranjestad lo continua manera semper na Gate 4.  
• Ariba diano cu tin barco di crucero, acceso na e waf di Oranjestad lo

ta via Gate 9 (na e rotonde di Wendy's/Harbour Arena). E gate aki lo keda habri durante oranan cu e barco di crucero ta den waf. Trafico lo wordo dirigi via Gate 8 pa acceso na waf di

Oranjestad. Acceso na waf di Oranjestad ta limita pa hende cu un badge y vehiculonan

cu car pass valido di APA y autoridadnan. Ta pidi pa tene cuenta cu trafico di equipo di construcción cu tambe lo husa Gate 9.

**ACCESO NA OFICINA PRINCIPAL DI APA:**

• Acceso na oficina principal di APA lo continua via Gate 9 (na e rotonde di Wendy's/Harbour Arena). E gate aki lo keda habri durante oranan di oficina, cu personal di seguridad presente. Trafico lo wordo dirigi via Gate di Free Zone pa yega e area



temporario di parkeerplaats (cu lo wordo señala). Ta pidi pa tene cuenta cu trafico di equipo di construcción cu lo husa e mesun ruta aki. Tene na cuenta cu e informacion menciona aki por ser ahusta den transcurso di e periodo menciona.

Nos ta pidi disculpa pa cualkier inconveniencia cu e cambio temporal aki por causa y di antemano ta gradici tur empleado, autoridadnan y demas usuario di waf di Oranjestad pa e comprension y cooperacion.

Por favor sigui tur e señalnan y instruccion di e personal di seguridad pa garantisar un fluho di trafico sigur y eficiente durante e periodo di mantenimiento. Referi tambe na e mapa cu ta indica e acceso temporario pa drenta waf di Oranjestad.

## MINISTER GEOFFREY WEVER A REUNI CU CAMARA DI COMERCIO RIBA TEMANAN CLAVE PA ECONOMIA



Oranjestad, 18 di april 2025 – Diahuebs mainta,

Minister di Finansa, Economia y Sector Primario, Geoffrey Wever, a tene su prome reunion oficial cu Camara di Comercio (KVK) den su rol nobo como minister di Finansa, Asunto Economico y Sector Primario. E reunion ta parti di un serie di audiencia regular cu KVK ta organiza cu minister

Wever cada seis siman, cu e meta pa mantene un dialogo continuo riba desaroyonan economico y necesidadnan den sector priva.

Durante e reunion a trata punto relevante pa comercio local y crecimiento economico. Camara di Comercio ta un partner strategico y

su input, consehonan y preocupacionnan ta wordo tuma den consideracion constantemente.

Puntonan halto riba e agenda di KvK tabata entre otro:

- KvK su survey tocante 'bottlenecks' pa comercio;
- Banking fees;
- Implementacion di (mas) Inteligencia Artificial (IA) den comercio;
- Incentivonan fiscal;
- Status di procedimiento di Rijkswet.

“Mi ta gradici Camara

di Comercio pa e dialogo constructivo y nan disponibilidad. Pa sa kico ta come y bebe den sector priva, nos mester ta semper dispuesto pa scucha y dialoga directamente cu nan”, Minister Wever a declara.





Parlamentario Endy Croes:

# MAN DRECHI DI GERLIEN A LEAK INFORMACION MIKE DE MEZA DEBE 2 MIYON NA BELASTING Y NO TA PASA SCREENING

Parlamentario Endy Croes a divulga cu hendenan cerca di Gerlien a leak informacion. Den un combersacion durante e weekend largo aki a topa un man drechi di Gerlien Croes den un ambiente y inesperadamente por a ricibi varios informacion valioso. Man drechi di Gerlien Croes a basha abou riba Mike de Meza formalmente y asina nos a adkeri informacionnan nobo sin cu nos ta puntra p'e. Kico ta e intension? Time will tell!

Mike de Meza debe 2 miyon florin na belasting. Segun e man drechi di Gerlien Croes aparentemente e tin informacion nobo cu mas presicion cu e lo a adkiri. E man drechi a sigui divulga alrespecto e screening di Mike de Meza. El a sigui splica cu Mike de Meza y esposa tin un debe di 2 miyon florin na belasting hunto. Nos no a hib'e ni trece pero solamente a keda scucha cu hopi atencion. Aparentemente Mike de Meza lo a bende

su compania hopi aña pasa pa un suma hopi grandi (algun miyon), pero nunca a declara esaki na belasting y awor esakinan a bin ariba. Alabes Mike de Meza "aparentemente" no a ni entrega papelnan di belasting pa locual ta trata e aña cu e benta miyonario a tuma lugar y te cu awe e NO por prueba na belasting kanto un documento unda cu el a entrega su aangifte di e aña specifico aki. Pues ta hopi cla cu Mike de Meza muy posiblemente a ontduik belasting y awor e batata cayente ta stobando.

Mike de Meza no tin chens pa bira Minister. Cu e splicacion di e man drechi di Gerlien Croes aki ta hopi cla cu ni cuanto Mike de Meza bringa e no lo por bira Minister.

Ta un berguensa nacional pa un ex minister di finanzas di AVP di pais Aruba actua di e forma aki. Ki ehempel bo por ta pa pueblo? Bo no ta integro. Bo no por ta un sirbidor di e pais aki dado caso



e man drechi di Gerlien Croes su informacion ta cu exactitud. Nos sa cu e ley di screening ta prohibi pa duna informacion alrespecto screening y p'esey ta masha tiki persona mag di ricibi e informacionnan di screening. Esnan altanto ta e dos Formadornan esta Mike Eman y Gerlien Croes, e candidato pa minister esta Mike de Meza y tambe Gobernador.

Pues ta depende di e Formadornan na kendenan nan kier leak cierto informacion y kico ta e meta tras di leak e informacionnan aki. Un cos ta sigur cu e righthand di Gerlien Croes a papia cu hopi firmesa manera cu e ta hopi bon informa. Algo cu nos no por confirma

ta cuanto informacion Gerlien aparentemente a pasa pa su man drechi pa e conta nos asina detaya. Nos lo keda monitorea e situacion di e candidato di AVP Mike de Meza y su proceso di screening y lo keda informa pueblo. Hallo Mike Eman, come in!!!

## Clasificados





**SOLODIPUEBLO@GMAIL.COM**

**CEL. 585 9500**





En conexion cu trabounan di mantencion necesario diabierna, 25 di April 2025  
Departamento di Finanzas ta cera pa publico.

Ta pidi disculpa pa cualquier inconveniencia.



# CLA PA REPRESENTA ARUBA NA E NIVEL MAS HALTO DI KARATE KUMITE



Rob Timmermans ta clasifica pa e World Games Chengdu, China 2025  
Recien a drenta e noticia cu atleta di Karate Kumite +84kg, Rob Timmermans a logra clasifica pa e World Games cu lo tuma luga na Chengdu, China den luna di augustus 2025. Esaki e la logra despues di termina number 2 den e ranking mundial den su categoria di peso. Ultimo na e weganan Panamerican di Santiago2023, Rob a logra gana un medaya di brons pa Aruba den Karate.

E “World Games” ta un evento multi deportivo cu tambe ta pasa cada 4 aña, cu ta conta cu participacion di deportenan cu no ta



Male Kumite 84+ Kg

Filter athletes or countries...

TOP 10		
RANK	ATHLETE	COUNTRY
1 ←	TAHA TAREK MAHMOUD	EGY - EGYPT
2 ↑	ROB TIMMERMANS	ARU - ARUBA
3 ↑	SALEH ABAZARI	IRI - ISLAMIC REPUBLIC OF IRAN
4 ↑	RYZVAN TALIBOV	UKR - UKRAINE
5 ↓	ANDJELO KVESIC	CRO - CROATIA
6 ↑	MATTEO AVANZINI	ITA - ITALY
7 ↓	ANES BOSTANDZIC	BIH - BOSNIA & HERZEGOVINA
8 ↓	MEHDI FILALI	FRA - FRANCE





# TRANSPARENCIA Y DIALOGO HONESTO PA YUDA DEPORTE

Diahuebs ultimo P.P.A. a ripara un consternacion atrobe di varios club cu ta huur e facilidad na Centro Deportivo Simeon Antonio. Ta trata aki mas di 10 club cu tin mas di 100 miembro cu ta practica diferente disciplina den deporte.

E motibo di e consternacion ta cu un club di gimnasia kier of a cera un convenio cu Fundacion Lotto pa Deporte despues di a consulta Minister di Deporte pa uzo structural di e facilidad. Cua convenio aki, supuestamente nan por yega na remarca pa haya recursonan di un asociacion internacional di gimnasia, cu por yuda desaroya e disciplina aki na Aruba. Un desaroyo no desconoci den e otro

disciplinanan aki na Aruba y esaki sigur por yuda e club di gimnasia. Loke ta straño ta dicon e asociacion internacional aki ta yuda un club y no e asociacion di gimnasia di Aruba.

Di otro banda tin mas di 10 club cu ta representa mas di 100 miembro ta den incertidumbre, si despues di 17 di april nan por sigui huur e facilidad aki. Cu si nan por duna lesnan na e hobennan di Simeon Antonio y vecindario pa haci deporte, movecion y recreacion. Cu si nan lo sigui co-educa nos hobennan pa nan por ta mas disciplina y keda leu di maldad. Pasobra, un deportista mas, ta un delincuente menos! E

clubnan aki ta consisti di boluntarionan cu ta sacrifica nan tempo y hopi biaha placa pa yuda forma nos hobennan y yuda mantene e adultonan saludabel.

P.P.A ta boga pa stimula deporte como un actividad inclusivo. Esaki ta nifica cu tur mucha te cu adulto mayor, di tur status socio-economico y tambe personanan cu limitacion mester wordo stimula pa haci movecion y deporte. Ademá tur esnan cu ta desea pa practica deporte mester haya e posibilidad y oportunidad igual pa haci esaki. Nos centronan deportivo rond di Aruba a wordo crea pa varios gobierno den pasado pa por duna e oportunidad aki.

Ta p'esey nos di P.P.A ta urgi minister encarga cu deporte, su excelencia sra. Gerlien Croes pa aclarea e situacion aki. Mantene un nivel di transparencia saludabel y no perhudica e deportistanan y e pueblo di Simeon Antonio en general. Door di dialoga cu e clubnan (y nan federacionnan) cu ta uza e facilidad y e club of federacion di gimnasia cu a haci e peticion pa su uzo, por mitiga e consternacion aki. Banda di dialoga, sostiene, elogia y yuda e clubnan aki cu ta representa mas di 100 miembro di e bario di Simeon Antonio y vecindario pa nan por sigui haci movecion y practica nan deporte preferi structuralmente.



Di otro banda ta bon pa Consejo di Gobierno yuda e club of federacion di gimnasia pa nan por haya e sosten internacional pa desaroyo di e disciplina di gimnasia na Aruba sin cu mester ocasiona ningun consternacion. E lo ta lamentabel si Aruba perde e oportunidad aki pa falta di vision den deporte y no por soluciona e situacion aki.

Partido MEP:

## Awor cu tin espacio financiero; FRACCION DI MEP DESDE PARLAMENTO LO PERCURA PA INSTITUTONAN ENCARGA CU NOS MUCHNANAN SPECIAL HAYA E FONDO NECESARIO PA POR DUNA E MUCHANAN E ATENCION CU NAN MESTER

ORANJESTAD – Den cuadro di luna di April cu ta e luna contra violencia di mucha, Fraccion di Movimiento Electoral di Pueblo MEP, ta bishitando varios instituto cu ta duna enseñansa/educacion na nos muchanan. Diaranson mainta a toca turno na Brighter Future Academy na unda Parlamentario Evelyn Wever-Croes acompaña pa Parlamentario Shailiny Tromp-Lee a pasa bishita nan pa asina scucha di nan kico ta nan necesidadnan,

preocupacion y planesnan pa futuro.

Parlamentario Wever-Croes a indica cu durante gobernacion di Gabinete Wever-Croes a pone e fundeshi pa enseñansa special mirando cu tin hopi alumno cu mester enseñansa un poco mas special pa locual ta nan necesidadnan. E ta sumamente importante pa tur nos muchanan por haya un educacion na nan nivel incluyendo esnan special. Tambe

Parlamentario Wever-Croes a enfatisa cu di nan banda y desde Parlamento, nan lo haci tur loke ta na nan alcance pa e Gobierno actual no sigui cu e plan di corta den enseñansa ni den asuntonan social.

Gabinete Wever-Croes a laga un surplus di mas di 500 milyon florin pa asina por duna bek na comunidad y akinan tin un instituto cu awor cu tin espacio financiero mester bin na remarke pa e sosten financiero



aki. Desafortunadamente no tabata tin e espacio financiero prome pero awor cu tin placa, fraccion di MEP lo yama Gobierno

aden pa pone placa pa institutonan cu ta encarga cu nos muchanan special pa asina nan haya e atencion cu nan mester.



Rycond do Nascimento:

# MIKE EMAN TA UN BON LIDER?



Ora cu AVP a cay na cero asiento na fin di añanan setenta, Henny Eman a bin bek for di Hulanda y logra crece e base leal di AVP na un grupo firme di mas o menos cinco mil votador sigur. E resto semper tabata swing voters. Mike Eman a hereda e base aki y a logra aumenta e grupo fanatico di AVP na mas o menos 10 mil votador. E cifranan aki tabata wordo proteha fervientemente for di e demas lidernan den AVP door di Henny hunto cu su amigo Koos. P'esey maske AVP a pasa door di varios escandalo di corrupcion y tencion interno den e partido, e base fiel di Eman semper a keda firme. Esaki danki na cantidad di aña cu Mike tin den politica, e tipo di liderazgo cu e semper ta proyecta (djis wak e potretnan: manga lora brasando hende grandi, mucha y trahadornan). Pero, segun hopi hende, un parti di su capital politico

ta debi na e cantidad di fabor politico cu Henny y Mike a parti durante e añanan. Mike ta sin duda un lider cu experiencia. Su experiencia den gobierno nacional y contacto internacional ta pone cu su perfil ta fuerte y conoci. Hende conoce Mike Eman tambe como un pensador strategico den marketing y den politica interno. E sa exacto con pa move den AVP, cu gran sentido pa e momento y e relacionnan di poder. Cu yudansa di amigonan den prensa, manera Leoncita Arends, René Zwart, Patrick Paskel y Speed, Mike semper a sa di controla su propio narrativa, defende su mes, y pinta su contrincantenan preto. Pero ojo: bao di e mascara di gran estadista, Mike Eman ta un gran manipulador, cu ta elimina su oponentenan interno y ta redistribui poder den su partido segun su propio plan. Ta p'esey Gerlien a

prefera negocia su salida cu Mike enbes di sufri destruccion den man di un Eman.

Gerlien tabata sa bon bon con Mike Eman a traha pa elimina tur menasa pa e poder di Eman. Prome esey tabata Tico Croes, y despues tambe Otmar Oduber. Mike a elimina nan cu ayudo di su amigonan politico di confiansa: Benny Sevinger, Arthur Dowers y Mike de Meza. Mike nunca a drenta den un confrontacion habri, sino a uza e tactica tipico di Machiavelli: aislamiento, mina confiansa, y traha riba nan reemplazo. E resultado? Un AVP caminda Mike a bira mas y mas central, na unda e ta presenta su mes como un salvador di Aruba, un amigo y un lider cu ta scucha e curason di pueblo, pero tras di e cortina di huma aki Mike a traha pa tin control completo.

E zet mas grandi tabata na vispera di e ultimo entregamento di lista na 2024. Maske AVP crece na 2009 y 2013 danki na e militancia continuo di Arthur Dowers, Mike de Meza y Benny Sevinger. Maske nan tabata su amigonan, pero toch, di un dia pa otro nan a bira un obstaculo pa Mike. Na momento cu e "hala bieu" aki di e partido a cuminsa bira un menasa pa Mike su liderazgo, Mike a cuminsa cu su plan nobo: Wendrick Cecilia.

Mike a play inocente, supuestamente uzando Wendrick como su chauffeur pa hib'e di entiero pa entiero. En realidad Wendrick tabata su inversion silencioso politico. Poco poco Mike

a cuminsa promove Wendrick como su "yiu politico", organisa evento na cas di partido y gaña cu ta Wendrick tabata e organisador, hiba Wendrick Hulanda y gaña cu Wendrick tabata e autor intelectual di e fondo di inversion cu Hulanda mester a yena y e 700,- florin di aumento di pensioen. Asina Mike a asocia Wendrick cu e lider, mientras bo no por a mira ningun potret di Mike cu Benny hunto mas. Mike tabata hasta evita di bay bebe koffie cu "e hala bieu". Na cierto momento Mike tabata cla pa lansa su candidato hoben como un lider nobo den e partido.

Ora cu e hala bieu a obliga Mike pone Wendrick riba number seis riba e lista, Mike a haci su move. E mainta di entrega di lista el a pone Monica Oplaat pone Mike como lijstduwer y Wendrick na su luga na number uno. Sin consulta, sin respet pa e partijraad y acuerdo interno. Un maniobra di poder, disfrazado como renobacion di e partido.

E resultado? Wendrick a saca cinco mil voto. Mike mes tambe. Tur otro hunto? Shete mil. E mensahe tabata cla: sin Mike y sin su yiu politico AVP no tin bida. Asina Mike a kibra e old boys.

Pero esaki no a keda ey. Awo strategicamente Mike a pone Wendrick como minister, pero cu baby sitter: su handler Philippe La Reine. Naturalmente e yiu di Benny no. Mientras cu Mike Eman ta insinua cu ta MEP ta tras di e trancamento di e screening di De Meza, esunnan cu sa ta reconoce e man di Mike Eman den e zet aki tambe. Mike de

Meza tambe a wak e. Bo ta mir'e den su wowo cansa y tristo. Si Mike Eman haya su gana, Mike de Meza lo cay den e proceso di screening. Arthur Dowers lo keda completamente isola y Mike lo a bolbe consolida e poder den man di Eman. No pa merito, no pa transparencia, sino pa calculo, manipulacion y timing strategico.

Awe, cu mas y mas hende ta anhele transparencia, husticia y integridad, e movidanan aki mester pone nos pensa: Esaki ta e liderazgo cu ta sirbi e bon comun? Of e ta sirbi e interesnan politico partidario formando un sombra riba nos futuro? E panorama ta claro: e consolidacion di poder interno den AVP ta un hecho. E AVP-istanan cu a lanta Futuro pa Mike tambe a haya un bon deal. E pregunta ta keda kico nan kier haci cu e poder? E contesta ta den nan programa di gobernacion. Den e siguiente texto lo mi analiza a base di declaracionnan di e formadornan kico e programa aki ta revela, kiko e ta tapa y na ki nivel nan kier obtene poder.







# Noticia di Corte

## HUES A POSPONE CASO CONTRA HOMBER SOSPECHA DI A MALTRATA POLIS



ORANJESTAD – Diahuebs mainta e homber F.D.L.S.D. ( 55) a presenta den Corte pa e caso penal cu Ministerio Publico a cuminsa contra dje. E ta wordo acusa cu riba 4 Augustus 2022, a maltrata dos agente di Polis.

SOLO DI PUEBLO por a compronde cu F.D.L.S.D. a para riba cu e no a maltrata Polis. El a bisa cu e tabata geboei y ta Polis a maltrat'e.

A MALTRATA POLIS Fiscal a bisa cu e acusacion contra F.D.L.S.D. ta cu dia 4 Augustus 2022, el a maltrata dos agente di Polis. Por a ripara cu F.D.L.S.D. tabata hopi emociona y tabata bisa cu e no a maltrata e dos agentenan y cu e tabata geboei.

Hues, diferente biaha mester a hala atencion di F.D.L.S.D. pa e keda tranquil y scucha kico Hues

ta bisa. Hues a puntr'e kico a pasa dia 4 Augustus 2022.

F.D.L.S.D. a bisa Hues cu el a pleita cu su yiu pa asunto di auto. Despues di e pleitamento, el a cuminsa saca tur su cosnan for di e auto. El a sigui bisa cu na dado momento Polis a yega su tras y a bis'e cu e ta deteni. Segun F.D.L.S.D., e no a resisti y a laga Polis boei su mannan y el a bay cu nan. Segun e sospechoso, durante cu e tabata canando, Polis a push'e y el a slip den un rooi y cay. E sospechoso a bisa Hues cu esey tabata e momento cu Polis a dal'e.

“MI NO A DAL POLIS”

F.D.L.S.D. tabata hopi emociona y a lanta su manga di flanel pa muestra Hues caminda cu Polis a dal'e cu clob na su man drechi y cu te ainda e tin un bulto eynan. El a sigui bisa cu despues 3 otro agente di Polis a bin lucha cun'e. El a bisa cu un di

nan a primi su zapato na su nek. F.D.L.S.D. a para riba cu e no a dal Polis pasobra e tabata geboei. El a nenga tambe di a morde y skop e agentenan di Polis, manera ta para den e relato di Polis. F.D.L.S.D. a bisa Hues cu e no a resisti contra Polis.

HUES A POSPONE E CASO

Na dado momento, abogado mr. Illes a presenta den sala di Corte. E abogado, cu cara sorprendi, a informa Hues cu el a haya yamada un dia promer di Departamento di Asuntonan Social pa tuma e caso pero e no a haya oportunidad di comunica cu F.D.L.S.D. y no tabata sa cu e caso tabata Diahuebs.

Hues a compronde e situacion y a duna e abogado chens pa e papia cu e sospechoso pafor di sala di Corte. Ora e abogado a bolbe, el a pidi Hues pa pospone e caso pa asina e por prepara su

mes pa defende F.D.L.S.D. e caso ta keda pospone pa Hues a bisa e abogado cu dia 19 Juni 2025 mainta.



STATEN VAN ARUBA

OPENBARE BIJEENKOMST OP 28 APRIL 2025 OM  
09:00 UUR V.M. IN DE VERGADERZAAL VAN DE STATEN VAN ARUBA

TE BEHANDELEN ONDERWERP

### Agenda:

1. Toelichting door de Minister van Financiën, Economische Zaken en Primaire Sector, dhr. mr. G.B. Wever met betrekking tot de door de Verenigde Staten ingevoerde handelstarieven.

De Griffier,

mr.drs. Herman Ch. J. Hek



STATEN VAN ARUBA

OPENBARE BIJEENKOMST OP 29 APRIL 2025 OM  
13:00 UUR V.M. IN DE VERGADERZAAL VAN DE STATEN VAN ARUBA

TE BEHANDELEN ONDERWERP

### Agenda:

1. Toelichting door de Minister van Financiën, Economische Zaken en Primaire Sector, dhr. mr. G.B. Wever over de standpunt Kabinet inzake de Rijkswet Aruba Financieel Toezicht door Land Aruba

De Griffier,

mr.drs. Herman Ch. J. Hek



# ARUBA TA UNI NA E CELEBRACION DI DIA DI MAMA TERA 2025: CU E TEMA NOS PODER, NOS PLANETA

ORANJESTAD - Dia di Mama Tera ta observa riba 22 di april 2025, hunto cu e tema mundial pa e aña aki 'Nos Poder, Nos Planeta'. E enfoka di e organisacion Earthday.org ta riba e importancia di energia renobabel y e accion colectivo cu nos por tuma pa proteha nos planeta pa futuro generacion tambe por disfruta di un mundo saludabel y menos dependiente di energia fosil. Pero tambe encurashando mas participacion pa accion y conservacion di naturalesa.

'Nos Poder, Nos Planeta' ta un yamada na cada un di nos pa uza nos influencia – como individuo, den nos comunidad, y den gobernacion pa sostene un transicion urgente y husto na un futuro di energia renobabel/duradero. Aruba ta conoci pa su naturalesa unico y tambe su hospitalidad. Ta p'esey ta reconoce e urgencia pa atende e topico di cambio di clima y pa promove practicanan sostenibel. Aunke con chikito e accionnan por ta, un poco di parti di cada un di nos ta yuda.

Durante Dia di Mama Tera 2025, diferente organisacionnan lo enfoca riba e miho practicanan y consehonan y probablemente organisa actividadnan pa conscientisa y stimula accion. Esakinan por encera algun di e accionnan aki:

- Haci limpi den area di naturalesa: Boluntarionan lo uni pa haci nos beachnan limpi, parkenan y areanan natural cu ta frecuente hopi. Probecha e temporada di campamento 2025 pa uni e

grupo di famia y amigonan pa haci y tene e area limpi di sushedad.

- Plantamento di mata: Iniciativanan pa planta mas matanan local pa fortifica nos ecosistema. Riba e pagina di DNM di Facebook por haya tur e sortonan di mata protegi pa leynan local. Pero por pensa pa planta otro matanan tambe manera, mata di seida (cuminda pa parha), mata di fruta of berdura. Tambe DNM ta encurasha comunidad pa sali busca matanan grandi y midi esakinan, asina ta aporta na e encuesta "midi nos matanan" riba e website di DNM, [www.dnmaruba.org](http://www.dnmaruba.org). E proposito ta pa haya esakinan registra pa proteha nan como matanan monumental cu balor halto den nos naturalesa.

- Tayer y/of presentacion educativo: Por busca un podcast cu sesionnan informativo tocante energia renobabel, conservacion di awa, reducion di desperdicio, y otro topiconan di sostenibilidad. Ta invita bo pa sintonisa nos podcast "Cadushi ta zona cu Dyrick" cu ta sali cada pasa 2 siman riba diahuebs. Sintonisa esun di e siman aki cu invitadonan sra. Olinda Rasmijn ex presidente di Stimaruba y sr. Pancho Geerman di Museo Arkeologico.

- Exposicionnan di producto y servicio sostenibel: Tin negoshinan local cu ta ofrece alternativa ecologico y tin productonan alternativo cu ta sostenibel. Considera uza un copi reusabel ora di busca bo copi koffie di tur mainta. Awendia por wak cu tin diferente caminda pa recarga autonan electrico.

Corda riba e tasnan di compra reusabel.

- Campaña di conscientisacion riba media social: Pone un publicacion cu ta promove animo pa hende comparti nan compromiso y accionnan pa un planeta mas saludabel uzando e hashtag #DiaDiTeraAruba, #NosPoderNosPlaneta #ourpowerourplanet #earthaccionday. Tuma un accion, saca un potret di esaki y publica riba bo plataforma social preferi y

uza e hashtagnan.

"Dia di Mama Tera ta un momento importante pa reflecciona y tuma accion" asina director di DNM. sr. Gisbert Boekhoudt a bisa. "Hunto, nos tin e poder pa crea un impacto positivo pa nos planeta. Nos ta invita cada habitante di Aruba pa participa den e celebracion aki y pa haci compromisonan duradero pa un futuro mas sostenibel."

Aruba ta compromete na un futuro duradero berde y

ta traha activamente na diversificacion di e economia pa asina reduci e dependencia riba combustible fosil. E celebracion di Dia di Mama Tera 2025 ta un oportunidad pa reafirma e compromiso aki y pa encurasha participacion di tur sector di nos comunidad. Nos ta invita tur miembro di prensa pa uni den e celebracion aki y asina yuda plama e mensahe di 'Nos Poder, Nos Planeta' na henter Aruba.





# ARUBA TOURISM AUTHORITY (A.T.A.) A FINALISA SIMAN DI REUNIONAN STRATEGICO DEN EUROPA

Aruba Tourism Authority (A.T.A.) a finalisa un siman di reunionan importante na Europa, caminda cu a combina sesionan interno strategico cu presentacionan di diferente agencia di “advertising” specialisa den e mercado di Europa -como parti di un evaluacion integral di A.T.A. su strategia di “advertising” pa e region.

Durante e siman, e ekipo a participa den sesionan enfoca riba A.T.A. su “Multi-Annual Corporate Strategy” (MACS) cu ta acapara aspiracion pa cu desaryo di nos turismo te cu 2035. Enfoce tabata riba e obhetivonan y accionnan concreto delinea pa e aña aki y pa 2026 entre otro. Aki a delinea y describi e papel di A.T.A. Europa y su actornan den logra metanan stipula.

A.T.A. ta traha cu varios agencia internacional pa asina posiconar Aruba den diferente pais. Un parti standard di A.T.A. su operacion ta pa evalua e funcionamiento di cada agencia y pa habri un proceso di “bidding” cada pasa tanto aña. Como tal parti di e agenda a inclui finalisacion di un proceso di ‘evaluacion extenso’ a base di un destahop a asina determina e agencia cu lo continua cu A.T.A. y traha hunto cu nos organisacion riba posicionamento di Aruba na Hulanda y den diferente mercado na Europa. Proceso asina ta wanta A.T.A., Aruba y agencianan cu ta

representa Aruba skerpi. E ta conduci tambe na mehoracion den strategia dirigi riba cada mercado. Mas cu claro A.T.A. ta keda dirigi y delinea na kiko mester atene nan mes y pues kiko e strategia integral y metanan grandi pa Aruba ta, esaki pa medio di e “Request for Proposal” (RFP) formal cu ta presenta na agencianan cu a logra ta parti di e lista final. ‘DEPT’ ta e agencia actual pa Aruba den e mercado Europeo.

E siman tambe tabata un cu significado emocional, mirando cu e team di A.T.A. Europa a uni forsa pa duna un despedida yena di cariño na Sharmin de Vries, cu despues di dies aña trahando pa e organisacion, lo bai cuminsa un capitulo independiente. Ehecutivonan di Aruba a gradisi Sharmin y e ekipo completo pa e dedicacion y labor desplega.

Hecho ta cu Europa ta sigui ta un mercado unda ta desea di crece, como parti di diversificacion di mercadonan pa Aruba.

E situacion actual na Merka tabata parti di e agenda, cu a enfoca riba crea un plan di contingencia pa Aruba unda Europa lo por hunga un papel den esaki. A.T.A. lo sigui traha riba esaki den e proximo dianan pa asina delinea kiko Europa lo por kieren si e situacion na Merka impacta fluho di bishita pa Aruba negativamente.



E meta pa Europa pa 2025 ta un crecimiento di 2.5% di huespednan cu ta yega

## Paga bo cuenta online ta facil

Sea  
Abonnement  
of Aviso



Pa hasi pago online pone number y adres na  
cuenta di banco RBC Sunmax Printing  
account # 7700000100152447



# GOBIERNO TA RECONOCE COMPROMISO PA GARANTISA SIGURIDAD DURANTE E SIMAN DI CAMPAMENTO

Prome Minister Eman a realisa un bishita oficial na Polis Maritimo pa expresa su reconocimiento pa e manera eficiente cu nan a responde na e peticion di gobierno. Den coordinacion cu Strandpolitie, Cruz Cora y Aruba Tourism Security Patrol, a intensifica nan presencia y vigilancia for di riba lama, sigurando un proteccion adicional den e periodo di campamento. Durante e bishita, a bira cla cu e edificio actual di Polis Maritimo ta den estado di deterioro total. Schimmel y falta di mantencion a pone cu a muda e personal pa Barcadera, mientras cu nan boto ta staciona na waf di APA, locual ta crea un situacion ineficiente. A pesar di tur esaki, e compromiso y dedicacion di Polis Maritimo ta notabel y di aplaudi. Strand Politie y Aruba Tourism Security Patrol tambe a demostra nan determinacion den mantene nos beachnan y area turistico sigur. Mientras comunidad ta descansa den fin di siman y riba dlanan liber, Strand Politie ta vigila nos costanan y Aruba Tourism Security Patrol ta mantene siguridad na e areanan frecuente pa nos bishitantenan. Prome Minister a gradici Raquel Ras, District Chef Noord, pa e compromiso incondicional cu Strand Politie tin pa percura pa siguridad y mantene ordo publico den e area hotelero. Ademá Prome Minister a aplaudi e trabao di Aruba Tourism Security Patrol y Aruba Tourism Authority y AHATA pa facilita esaki. Prome Minister a culmina

su bishita na Baby Beach, unda mas cu 1800 hende ta campando. Cu un evento musical grandi planea pa diadomingo, e necesidad pa reforsa e presencia policial ta esencial. Gobierno ta pone prioridad riba siguridad colectivo, un esfuerzo conhunto entre KPA, Rode Kruis, TSP, ATA, AHATA y nos pueblo mes.

Durante su bishita, Prome Minister a gradici Inspector Susy Nadal pa su liderato y determinacion, y a reconoce e esfuerzo di Rum Reef Restaurant pa facilita un area pa crea un oficina temporal pa Polis durante e siman di campamento.

Cuerpo Policial ta trahando hunto cu comunidad, patruyando e areanan manera Santo Largo, Zwart Mangel, Rincon, Grapefield, Santana di Cacho, Baby Beach y Rodgers Beach. Cu comunicacion continuo cu campadonan y bon maneho, ta confia cu e siman lo pasa den harmonia y tranquil. Inspector Nadal ta haci un apelacion na esnan campando of bishitante beach, pa limita e consumo di alcohol pa evita incidentenan lamentabel.

Tabata apenas dialuna ultimo Prome Minister mr. Mike Eman, hunto cu Minister di Turismo mr. Wendrick Cicilia, a convoca un reunion urgente cu e stakeholdernan relevante, cu e meta pa desaroya un plan di maneho efectivo pa e siman druk di Semana Santa. E reunion aki tabata esencial pa garantisa ordo publico,



siguridad y bienestar di tur ciudadano y bishitante di nos isla.





# SABIDURIA DEN NOS ALEGRIA

Skirbi pa Ruthy”Lady Ruth”Vrieswijk-Bergen



E ta recomenda tur cu por skirbi, combersa y hasi pregunta na bo mayornan, bo welonan y of bisawelonan si nan ta na bida ainda cuminsa skirbi. Esey ela hasi y skirbi un obra maestro titula: “Faya Lobi”. Tawata su di dos bishita oficial na BNA, nos por corda un crenchi tempo atras ora ela presenta e obra fantastico aki, cu tawata sold out mes ora.

Den un storia cu historia y documentonan y potretan, e dushi hende aki di nos ruman isla Corsouw pero cu curason arubiano tambe a bin ta skirbi y saca tur locual tawata na su mente, alma y curason di su dushi hendenan, su grandinan, su antepasadonan. Nos ta papiando di drs. Ange Jessurun cu a nace na Corsouw na anja 1954. Ta hopi cos Ange a hasi den su bida y hopi buki relaciona cu nos idioma papiamento ela skirbi cu su aporte activo di anjanan na e formacion y desaroyo cultural den su lenga materno

cu atencion special pa e hobennan. Ange ta e.o. e Mama spiritual di “Arte di palabra” cu ta competencianan exitoso pa e alumnonan di scolnan secundario. Faya Lobi ta su prome storia di amor, su prome “roman” na e idioma hulandes basa ariba storianan cu a pasa di berdad, acuerdonan y documentonan historico. E storia di su bisawelo chinees cu a biaha den 1865 for di Hong Kong pa Paramaribo Surnam en busca di un mihor bida. Esaki tawata e chispa di candela cu a dune mas sed, pone sinta, puntra, busca, rondia y skirbi e storia bibo aki di su mayornan y antepasadonan cu no a sosode un dos tres, pero a tuma un par di anja. Recientemente Ange a bin Aruba atrobe, e biaha aki den luna di April 2025 y a elabora mas ariba su buki Faya Lobi y a comparti di su bishita y participacion interesante na conferencia di lenganan materno na Santiago, e isla principal di Cabo Verde. E publico presente e anochi aki na

Biblioteca Nacional cu cooperacion tambe di Mirto Lacle y di DCA, mes por a scucha y wak hopi palabra cu nan ta papia y usa ayanan na Cabo Verde ta wordo papia y usa riba nos islanan ABC. E bunita presentacion literario aki na BNA tawata den cuadro cu Dia internacional di derecho di autor cu ambiente musical di Gian Giel y Johnny Scharbaay. Danki na Het Nederlands Letterenfonds Caribe, Tante Ange su buki Faya Lobi lo wordo entrega na scolnan di ensenanza secundario aki na Aruba tambe, manera ta e caso na su isla Corsouw y tambe na Surnam a entrega varios buki pa nan biblioteca pa tur por yega na dje pa lesele y na mas lugarnan e buki aki a wordo entrega. Ruby Eckmeyer, Marcia Dirks y Lady Ruth despues a pasa ratonan agradabel cu koffie, broodje en gebak na Bright Bakery den curason di Piedra Plat, combersando y compartiendo topiconan dushi positivo bunita y interesante. Diahuebs atardi prome cu e dia liber di Bierna Santo. drs. Ange Jessurun tawata ketobay super happy con su presentacion a bay Diamars dia 15 di April, pasobra e publico a sinti cu cada palabra cu cada expresion di curason, momentonan hopi pret y relajante pa e mentenan cansa di trabao. E “eye contact” cu su publico tawata tremendo, y



tawatatin hopi harimento. Ange Jessurun, un shon di hende muhe spontaan y carismatico. Diasabra Tante Ange a bay bek cas trankil, satisfecho cu hopi gradicimento na su humilde pero fuerte curason. Aruba ta stima e gran sra.dama aki, y ta desea Ange tur cos bon den bon salud, alegria y mas sabiduria ! ( Danki tambe na Jhon Freddy di DCA pa saca bunita potret y graba tambe ). Lieve Ange, hopi exito cu Faya Lobi y danki pa tur locual Ange a comparti cu

nos y regala nos scolnan di ensenanza secundario. Nos cas Aruba y nos curasonnan semper habri pa ricibi Tante Ange ! Danki pa lesa nos relato, un “Bearhug grandi diki gordo” pa tur nos bunita y dushi lectornan ! Ah si ! Last but not least : Danki na Jardin Caribe, lieve Vicky, pa e regalo di e rozanan reparti den e publico ! Lady Ruth como un autor, a aprecia esaki masha hopi mes ! Cu Pascu Grandi, Pascu di Resurreccion, un bida nobo pa nos tur !

**Clasificados**

**SOLODIPUEBLO@GMAIL.COM**  
**CEL.585 9500**



# Un bishita importante cu bista riba desaroyo di deportenan acuatico

## COMITE OLIMPICO ARUBANO A RICIBI BISHITA DI PRESIDENTE DI WORLD AQUATICS



Diaranson ultimo a ricibi bishita di un delegacion di World Aquatics cu ta e federacion internacional cu ta maneha e deportenan acuatico di natacion, natacion “open water”, natacion artistico, Water Polo y “Diving”. E delegacion presente di World Aquatics a conta cu presidente Sr. Husain Al-Musallam, Director Sr. Brent Nowick, Tesorero Sr. Dale Neuburger, miembro di “World Aquatics Athletes Committee” atleta Olimpico Dylan Carter, Consehero di entrenadornan di deporte acuatico Sr. James Gibson, y Sra. Maureen Croes cu ta Vice-Presidente di World Aquatics, ademas di ta Presidente di Panam Aquatics.

E bishita na Comité Olimpico Arubano a cuminsa cu un recorido di



e edificio, unda a muestra e diferente componentenan cu ta haci esaki e cas di deporte Olimpico na Aruba. Despues di e tour aki, a sigui pa un sala mas amplio na ATIA pa asina tene un reunion informativo y hopi dinamico, unda cu hunto cu miembronan di Aruba Aquatics Federation, a combersa cu e delegacion di World Aquatics riba e situacion actual di e deportenan acuatico na Aruba y e exito di esaki pa cu eventonan den ciclo Olimpico pa Aruba. A elabora riba e desaroyo riba nivel recreativo y competitivo di e ultimo añanan y alabes a elabora riba e puntonan di preocupacion unda ta mira oportunidad pa logra haci mas aun cu e situacion unico na Aruba. Apesar di e gran exito di e deportenan acuatico riba nos isla y participacion den exterior, e reto mas grandi ta keda e factor limitante di tin solamente un piscina adecua pa por



practica e deportenan aki. Finalmente, a bay pa momento social na Zeerovers, pa asina comparti un poco di nos dushi cuminda crioyo, y comparti como un solo comunidad cu ta traha pa deporte. COA ta gradici Presidente Al-Musallam y delegacion di World Aquatics pa nan bishita na Aruba y ta contento pa tende cu nan estadia aki tabata uno placentero

y cu nan lo sigui di cerca acuatico na Aruba. e desaroyo di deporte #TEAMARU





# WIKIPEDIA RIBA ARUBA A ORGANISA ENCUENTRO EDUCATIVO PA GLAM NA BIBLIOTECA NACIONAL ARUBA

Oranjestad Aruba - GLAM ta un abreviacion di galleries, libraries, archives, and museums y ta consisti di organisacion nan importante cu Wikimedian in Residence ta traha cune. Na Aruba esaki no ta diferente. Colaboracion y intercambio di informacion ta essential pa e proyecto di Wikipedia riba Aruba. Pa es motibo a organisa un encuentro dia 17 di April 2025, unda a brinda informacion na organisacion nan local, pa midi interes y mira posibilidad pa traha hunto.

Con pa digitalisa informacion pa medio di Wikipedia y ofrece fuente confiabel y accesibel


















**WIKIPEDIA OP ARUBA**  
**ARUBA OP WIKIPEDIA**

tabata e punto di enfoce. Durante e presentacion a duna tips y mustra ehempel di proyectonandi Wikimedia cu ta tumando lugar mudialmente. A elabora riba metodo nan di digitalisacion di informacion pa medio di Wikipedia, Wikimedia Commons y Wiki Data. E encuentro a conta cu presencia di varios organisacion



[https://commons.wikimedia.org/wiki/File:Wikipedia\\_on\\_Aruba\\_workshop\\_with\\_GLAM\\_organisations\\_at\\_Nacional\\_Library\\_of\\_Aruba.jpg](https://commons.wikimedia.org/wiki/File:Wikipedia_on_Aruba_workshop_with_GLAM_organisations_at_Nacional_Library_of_Aruba.jpg)

		Paardenbaaistraat 10, Oranjestad, Aruba Tel.: (297) 525 - 7555 www.lottoaruba.com	
<b>Resultado: Sorteo di Merdia 🌀 - April 22, 2025</b>			
<div></div> <div>Sorteo # 4600</div> <div>1541</div> <div>4436</div> <div>1997</div> <div></div> <div>x2</div> <div></div> <div>Sorteo # 4600</div> <div>6919</div> <div></div> <div>x3</div> <div></div> <div>Sorteo # 2656</div> <div>3973</div> <div></div> <div>Sorteo # 4600</div> <div>5144</div> <div>Tauro</div> <div></div> <div>Sorteo # 1474</div> <div>041</div> <div></div> <div>x2</div>		<div></div> <div>Sorteo #</div> <div>0 x Jackpot</div> <div>0 x Match 4+</div> <div>0 x Match 4</div> <div>0 x Afl. 12,00</div> <div>Joker</div> <div>Letter</div> <div>Proximo Jackpot</div> <div>360.000,-</div>	
		<div></div> <div>Sorteo #</div> <div>0 x Jackpot</div> <div>0 x Match 4</div> <div>0 x Afl 8,00</div> <div>Proximo Jackpot</div> <div>53.000,-</div>	
		<div></div> <div>Sorteo #</div> <div>0 x Jackpot</div> <div>0 x match 4</div> <div>0 x Afl. 500,00</div> <div>0 x Afl 50,00</div> <div>0 x Afl. 15,00</div> <div>Mega Ball</div> <div>Proximo Jackpot</div> <div>250.000,-</div>	
		<div></div> <div>MEGA IEUS</div> <div>Afl. 350.000,-</div>	
		<div></div> <div>Sorteo #</div> <div></div> <div></div> <div></div> <div></div>	
			

manera,                      Biblioteca  
Nacional,                      Stichting  
Monumentenfonds  
Aruba,                      UNOCA,  
Monumentenbureau,  
Museo                      Arqueologico

Biblioteca  
Stichting  
enfonds  
UNOCA,  
nbureau,  
queologico

Nacional Aruba (MANA),  
 Archivo Nacional,  
 Directie Natuur en Milieu  
 (DNM)  
 Sigui nos riba media  
 social pa mas informacion

di Wikipedia riba Aruba,  
si ta desea di colabora por  
manda un email na e team  
di Wikipedia riba Aruba:  
wikipediaonaruba@  
wikimedia.nl



# CAMBIO Ariba

## LANDSVERORDENING BEPERKING TABAKSPRODUCTEN

(AB 2016 NO. 44)





# HALA ROSEA LIBREMENTE

*BREATHE FREELY*  
LANDSVERORDENING BEPERKING TABAKSPRODUCTEN

### PROTEHANDO **SALUD** PUBLICO

*Cu introduccion di e ley aki DVG y Gobierno ta trata na reduci e riesgo pa malesanan cronico cu es cu ta huma por desaroya, como tambe proteha e 'second-hand smoker' y preveni e hoben di cuminsa huma na un edad jong.*

**1 Artículo 2:** ta prohibi pa huma den luganan publico.

**2 Artículo 2A:** ta prohibi pa huma den transporte priva ora cu tin menor di edad den auto.

**3 Artículo 3:** doño di trabou ta responsabel pa proteha su empleadonan for di huma di sigaria durante orario di trabou y riba tereno di trabou.

**4 Artículo 4:** ta prohibi pa huma den tur forma di transporte publico.

**5 Artículo 5:** ta prohibi pa vende of duna productonan di tabaco den cierto instancianan.

**6 Artículo 6:** ta prohibi pa vende of duna productonan di tabaco na personanan bou di 21 aña.

**7 Artículo 6A1:** ta prohibi pa parti productonan di tabaco gratis.

**8 Artículo 6A2:** ta prohibi pa vende sigaria los. Sigaria mester wordo bendi den paki cera y sea.



# PELICULA E BRUHA, BRUHÁ A SKIRBI HISTORIA PA: ADDONSITO CROES



Debi na e exito den bishitante cu den su prome siman na The Movies e pelicula local E Bruha, Bruhá a produci, e cinema a dicidi hunto cu productor Desiree Croes pa alarg'e di 10 pa 17 di april. Den su di dos siman e pelicula a cosecha un éxito mas grandi ainda cu tawata inclui 5 sala completamente bendi. Na number di Berea Productions, Desiree Croes y Addonsito Croes ta yama danki na cada amigo y invitado cu a honra nos pelicula cu nan bishita. E bruha, bruha a tuma total 11 luna pa filma y tawata Semi Chahmi esun cu a filma y edit'e. Cu orguyo y agradecimento e elenco principal cu ta Desiree Croes (Genoveva), Addonsito Croes (Francis), Yvonne Tromp (Dudu), Yolanda Croes (Margarita), Mirtho Tromp (Gabriel), Ruben Croes (chauffeur religioso), Nigel

Maduro (Indjan), Eddie Sambo (cliente), Marisol Tromp (cliente) y cu naracion di Erin Croes, ta gradici un y tur cu a bay wak e pelicula aki. E pelicula local aki a resulta 100% esun cu mas publico local a trek e ultimo 10 año. E no ta un mundo facil pa Arubianonan sali y bin wak un pelicula, sigur no uno local, pero orguyo e pelicula E Bruha, Bruha si a logra trek basta hende local y esaki a inclui cinco sala VIP yen. E comentarionan di esnan presente despues di e pelicula y riba social media a laga e productor y actornan sinti aprecia. E aplauso den e salanan na final tambe a demostra con hopi e bishitantenan a disfruta di dje. E Bruha, Bruha ta filmacion di e cuenta cortico di mesun titulo, saca for di e buki di cuentanan cortico NO MAS fo'i 2016 di Desiree Croes.

## SUDOKU

8								
		3	6					
	7			9		2		
	5				7			
				4	5	7		
			1				3	
		1					6	8
		8	5				1	
	9					4		

		9	8				4	
4				5				
			7	1				9
						8		1
	5	8				4	7	
6		3						
5				7	1			
				4				2
	7				9	1		

		5	3					
8							2	
	7			1		5		
4					5	3		
	1			7				6
		3	2				8	
	6		5					9
		4					3	
					9	7		



# FORTALEZA PA FAMILIA

Scirbi pa Pastor Marcel Balootje.

## COMPREMETE BO MES CU DIOS, NO COMPREMETE CU MALDAD

Tur hende mester tin compromiso cu Dios, pa asina ricibi guia di Dios den nan bida.

Con nos ta yega na un compromiso cu Dios? Awel na prome lugar nos mester entrega nos bida na Cristo Hesus, no tin otro manera pa yega serca Dios, Cristo Hesus ta e unico Mediador entre Dios y hende, E ta e caminda E berdad y bida.

Un compromiso cu Dios ta necesario pa nos crecemento spiritual, pasobra tur nos asunto cu Dios ta personal, salvacion ta personal, bendicion ta personal, sabiduria ta personal, asina ta keda demostra cu un bon relacion cu Dios ta sumamente necesario den nos bida.

Nos compromiso cu Dios ta wordo alimenta door di Oracion, Lesamento di e Palabra di Dios, ayuno, bishitamento di cas di Dios, medita den e palabra di Dios y no aparta for di Su palabra den nos bida, y asina nos lo tin exito y tur cos lo bay nos bon.

Tur hende ta biba y expresa nan mes segun e compromiso cu nan tin cu Dios, nan ta balora nan relacion cu Dios. Ora nos compromiso cu Dios ta fuerte y real bo ta ripara cu no ta facil bo ta desvia for di palabra, mandato y principionan di Dios.

Ora bo tin compromiso cu Dios, e temor di Dios ta resalta tur momento den bo bida, y cosnan carnal tin cu hala un banda pasobra bo compromiso cu Dios ta sobresali.

Den Genesis 39:7-12 Jose a demostra cu compromiso cu Dios, su temor di Dios y su Lealtad na Potifar, e a prefera di corre bay prome di cay den inmoralidad.

Compromiso cu Dios, ta haci hende serio y confiabel, fiel y firme den asuntonan di nan bida, cual ta nan ta prefera di keda bon cu Dios y aparta for di cosnan di maldad.

Job tabatin compromiso cu Dios y no cu rikesa, ora e diabel a ataca Job y a kere cu Job ta adora rikesa, Job a demostra su compromiso cu Dios, y door di esey Dios a dune dobbel di locual cu e tabatin.

Hesus tabatin un compromiso cu su Tata, door di demostra cu ta Su Tata a mande, y E no ta riba su mes, E a bisa semper cu Mi ta haci locual cu Esun cu mandami. Na e momento cu Hesus a lanta Lazaro for di morto e a bolbe ripiti esey den Juan 11:41-42 pa tur hende por sa cu e ta haci locual su Tata a mande haci, pasobra e compromiso tabata cu su Tata.

Tur mayor mester tin un compromiso cu Dios y

cu nan yuinan, pasobra yuinan ya un regalo di Dios, y como mayor e compromiso ta: Pa lanta nan den caminda di Senjor, pasobra ora esey no wordo haci, nos lo tin consecuencia serio, e diferencia lo wordo nota, ora un mucha lanta cu Dios, y ora un mucha lanta pa su mes kier. Pasobra e no a hanja instruccion serca su mayornan.



Compromiso cu Dios ta habri tur porta, compromiso cu Dios ta kibra kadena den nos bida, compromiso cu Dios ta pone nos aparta for di maldad.

Hende cu tin compromiso cu Dios ta aparta for di adulterio.

Hende cu tin compromiso cu Dios, no ta haci redo y perhudica otro.

Hende cu tin compromiso cu Dios ta stima nan prohimo y ta yuda nan prohimo. Hende cu tin compromiso cu Dios ta respeta, tur momento.

Hende cu tin compromiso cu Dios, ta decente, respetuoso y integro.

Laga nos balora nos compromiso cu Dios, laga nos demostra seriedad, y hopi temor di Dios.

## Oracion di dia


### UN DIA FRUCTIFERO Y CU E LUZ DI CRISTO POR BRIYA DEN CADA UN DI NOS

"... Pasobra tur hende cu halsa nan mes, lo keda humilia, ma esun cu humilia su mes, lo keda halsa". Lucas 18,14

Awe nos ta lesa e importancia di humildad y reconece nos faltanan. Nos por ta manera e fariseo husgando otro y halsando su mes of manera e cobrado di belasting ta reconece su falta y su necesidad di compasion. Cu humildad nos ta sirbi otro sin busca recompensa; scucha mas y papia menos, na balora e otronan pa loke nan ta y no pa loke nan tin of ta aparenta di ta. Reflexionando continuamente ta yuda evita na cay den orguyo y na mantene nos mirada fiho den e mision cu Señor a confia nos. Biba cu berdadero humildad ta nifica rechasa e mascaradanan cu hopi biaha nos ta pone pa impresiona of pa competi cu otro. No biba un bida superficial of di falsedad, sea un luz pa mundo unda e luz di Cristo ta briya den bo. Loke ta importa no ta con otronan ta mira nos, sino con Dios ta mira nos. Ser bo mes y cu humildad ta acerca nos na e berdadero esencia di nos fe y esey ta haci nos un instrumento den e man di Dios.

Oracion : Señor Hesus, haci mi curason pareu na bo curason. Manso y humilde y obedecido na bo Santa boluntad.

Amen.





# NA MEMORIA DI LUCIANO MARTINO

## “WICHI” CROES



Cu hopi tristeza SV Estrella ta anuncia morto di Sr. Luciano Martino Croes miho conosi comi Wichi, na bida un deportista, dirigente y un consehero deportivo exepcional.

Wichi tabata hunga como portero pa Estrella den anan 60 na un edad hopi jong. Como dirigente Wichi a fungi den bestuur di Estrella seccion futbol pa basta aña.

Wichi tabata presidente di hoofdbestuur di SV Estrella den final di decada 90.

Despues di esey Wichi a keda como consehero di Estrella, y na varios ocacion Wichi su conseho nan tabata conseho nan di ‘oro’ pa e organisacion. Wichi tabata tin un amplio conosemento di reglamento nan di AVB.

Wichi ta miembro honorario di SV Estrella.

Wichi tambe a forma parti di AVB for di: 1984 te cu

1992 como Secretario General y Comisario di AVB.

Alavez sr. Wichi Croes a forma parti di Comision di Apelacion te cu December 2019. Despues di Status Aparte Wichi Croes tabata un persona importante pa futbol di nos isla y tabata un di esnan cu a pasa den tur e procesonan pa Aruba por a haya reconocimiento internacional y bira miembro di FIFA y CONCACAF na 1988. (info Sr. Fico Vrolijk).

Sin lubida cu Wichi tabata president di ASU tambe pa un periodo.

Sin duda Wichi tabata un dirigente cu a hasi su trabou cu hopi dedicacion y amor. Wichi tabata un persona hopi integro, humilde y cu karakter suave unda su amabilidad tabata resalta.

SV Estrella lo bay haya su falta ja cu e ta laga un



bashi enorme den e mundo Deportivo y tambe sigur pa su famia y e famia grandi di Estrella.

Diamars 22 April pa 1:00 pm E restonan mortal di Sr. Wichi Croes lo pasa na veld di Estrella pa despues bay Misa Imaculada Concepcion di Santa Cruz. Bestuur di SV Estrella

ta manda un palabra di profundo condolencia na famia di Wichi Croes y cu Wichi sosega na pas.

**HALA ROSEA LIBREMENTE**

Cu introduccion di e ley aki DVG y Gobierno ta trata na reduci e risico pa malesanan cronico cu es cu ta huma por desaroya, como tambe proteha e 'second-hand smoker' y preveni e hoben di cuminsa huma na un edad jong.